



Kamis, 8 Juli 2021

Ogen: Esekiel 4:4-12



"Ndalani Ukumen"



Sanga anak-anak denga, megati kita ndatken ukumen paksa kita ngelakoken kesalahan. Ukumen enda ilakoken gelah kita ndatken pelajaren ras lanai ngulahi kesalahan e. Contohna, adi bas sekolah, adi la kita ngerjaken PR maka guru mereken ukumen tedis bas lebe-lebe kelas ntah nulis bas 1 buku. Bagepe, adi bas rumah adi la ndahiken dahin rumah, maka mamak/bapak mereken ukumen ngkurangi sen jajan ntah pe irawai. Enda pe seri halna ras kai siilakoken Esekiel ibas ngajarken bangsa Israel. Dibata mereken ukumen man bangsa Israel arah Esekiel nari.

Esekiel ndalani ukumen man bangsa Israel alu ndalani kerna piga-piga siisuruh Dibata man bana arah Esekiel 4:4-12. "*kam arus tading ije telu ratus siwah puluh wari dekahna janah ngenanami kiniseran erkiteken kesalahenna*" (ayat 4-5b).

Secara doni, tentuna Esekiel ndalani ukumen enda alu kiniseran si mbelin. Tapi Dibata tetap ras Esekiel, sebab enda me pengajaren si payo selaku sinjagai kegeluhen bangsa Israel, pemimpin si arus ertanggung jawab man bangsana.

Adi siukuri kerna kegeluhen, enggo nge kita siap ngaloken ukumen adi lit salah ras lepakta? *Berani berbuat berani bertanggung jawab*, tapi megati kita lanai nggit ertanggung jawab, siakap kita rusur pas, siakap ukumen e lanai bas jamanna, kita si salah, kalak ateta ndalani ukumenna, ras siakap lalap kita sipayona. Kalak si nggit ertanggung jawab bas kesalahenna, berarti ia ngasup jadi pemimpin man dirina jine. Ndalani ukumen e labo ngerana kerna kiniseranna, tapi lebih ke mpesikap kerna si lenga payo e , gelah bas perdalinen kegeluhenta lanai siiulahi kerna kesalahan e.